



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Kobi melii Russia Tir Vladimir Putin-i
India semdangtsü: NSA Ajit Doval

Son Heung-Min MLS
club LAFC nung denogo



VOL. XXII ISSUE NO. 294 (ADOK 294)

DIMAPUR

ROGONÜ (FRIDAY)

LUROI (LUROI) 08, 2025

₹ 5.00

Sorkar telemtetba nung temulung masür: 5 Tribes CoRRP

Kohima, Luroi/August 07 (TYO): State sorkari 7-member Reservation Review Commission tentettsü jembia aliba magizüker, ta tanü 5-Tribes Committee on Review of Reservation Policy (CORRP) ajanga ashi.

"August 6 nü State Cabinet nung Backward Tribe Reservation indang jembiba ya June 12 nü senden nung jembiba lephshiba dang lir. Yangji onoki akhangba tongtipangtiba senzuka yutsü aser Central Nagaland Tribes Council (CNTC), ENPO aser Tenyimi Union nungi CSOs densema Reservation Review Commission ang kumtettsü ang lemtet," ta 5

Tribes CoRRP indang convenor Er Tesinlo Semy aser Member Secretary GK Zhimomi nati ashi.

Mapang telatet makai küm 48 tashi reservation policy amshia aruba asoshi kuli bushia sorkar odongtari jembidang iba policy bhukumba yimya amshi aser tapi agi sorkar mapa nung inyakba kin telemsa agüja aser taruba census den Reservation Review Commission sendaktepba ya ozü movement mezüingmeshiba lir, ta ashi.

Anungji 5 Tribes CoRRP-i kün pongu sanger den senden mena telemtetba agütsü, ta paroki ashi.

Dimapur CP Kevithuto Sophie den tepila sentong agi

Dimapur, Luroi/August 07 (TYO): Dimapur Commissioner of Police, Kevithuto Sophie den tepila sentong ka Rhododendron Hall, Police Complex, Chümoukedima nung Brehostibarnü agia liasü.

Commissioner of Police, Kevithuto Sophie-i iba sentong nung tepila o jembidang, konang-nüngsang nung rangloker masü saka kü teinyaktsü mapa dak rangloker inyaka aruogo, ta ashi. Sophie ya Inspector General of Police (IGP) in-charge of Armed BN-IR and Village Guards mapa agizüktsü.

Aseni tajungtiba inyakogo ta temulung süa bilemtsüsa inyaktetbaji tongtipangtiba lir. Nisung ka kijai lokti ajunga memelenshitettsü, saka nisung shia pei akokba nung temelenshi bener arutettsü. Aser nai tajung meinyaktetra, lokti menentsüsa kecha meinyak tajungba, ta pai ashi.

Tensa azüoka nüburtem tesunep nung aliba ya police kisüngi masü saka nüburtem, lokti tentet, NGOs aser kaketshir temi shilem tajung agiba ajanga lir, ta pai pelaba lemsatep.

Shishilempaba tsütsü shilem tuluka Assam arütsüleni ogo, anungji Nagaland nungi sen aika Assam nung indoker, koba Naga nung rongsenketzüng tsütsü takoksa tulu lir, ta Sophie-i ashi.

Iba sentong nung DCP Niuland, Manish Bhartiya; Dimapur, Niuland aser Chümoukedima indang Deputy Commissioners; Deputy Commissioner (Crime)/PRO Dimapur; Naga Council Dimapur; Western Sumi Hoho; Dimapur District GB Association, Dimapur Muslim Council; Chakhroma Angami Kuda Union Dimapur aser Business Association Nagaland nungia o tatsütsü jembia liasü.

BJP nungi Mmhonlumo Kikon anenogo

Dimapur, Luroi/August 07 (TYO): BJP National Spokesperson aser 40 Bhandari Constituency nungi taoba MLA, Mmhonlumo Kikon-i Bharatiya Janata Party (BJP) indang primary aser active membership aser party posts ajunga nungi anenogo.

BJP Nagaland State Unit tir dangi züluba shiti nung, küm ter dak tema party den sendakteper arudang pa dak temulung lema maongka agütsüba aser mapa balala nunglokttsüba asoshi Kikon-i pelaba lemsatepa liasü.

Pai pa takum nung inyakyim asadangshitsü aser nüburtem den yaritepba aser policy mapa nung lenmang tasen bushitsü tejangraba nung iba telemtetba ya agi ta ashi.

"Yimya balala nung lokti maneni tenzüksü nüngdakba nem anidaktsür iba telemtetba agi," ta pai shiti nung zülü.

Kikon ya BJP nung tongti shilem aika agia liasü aser item rongnung National Spokesperson aser Prabhari (in-charge) of

Mizoram State dena lir. Pa ya BJP Nagaland asoshi State Election Officer liasü aser Nagaland Legislative Assembly nunga BJP Legislature Party indang Chief Whip inyakdanga liasü. Political tsütsü 40 Bhandari Constituency nungi pai 2013 aser 2018 election nung takok ngua liasü.

Taoba Cabinet Minister, Kikon ya Information Technology, Science & Technology, and New & Renewable Energy amala department asoshi Advisor to Government of Nagaland inyakba liasü.

State nung pai lanur, skill development aser IT dak sendakba maparen nung shilem balala agia liasü. 2020 küm Fame India magazine ajanga survey ka agiba nung Top 50 MLAs in India nunga pa dena liasü.

Kikon-i kakat ana zülua lir aser ASPEN Fellow lir. Pa Delhi University nungi English Literature nung Master's degree ngua lir.

Kohima nung ASU-i ILP nung aibelener nisung 69 jangjatet

Kohima, Luroi/August 07 (TYO): Naga nunger lisopur temeden aser maitsü wazüka ayutsü asoshi maneni inyaka Angami Students' Union (ASU) ajanga Kohima jila nung August 6 nü phase lemsar Inner Line Permit (ILP) vigil drive agia liasü. Iba mapang ILP tejangja maliba nisung 47 aser ILP mapang liwar mesüra document shidak maliba nisung 22 puteta state yimtiba nung temelaba makai immigrants tali aitba tebilemtsü tali tuluba kumdaktsür.

Aibelener nisung 69 prong nüngdakba mera agütsü asoshi Deputy Commissioner, Kohima indang office nem agütsüogo.

Immigration laws nung aibelenba indang kinük balala nungi kanga ashishitepba ajanga iba drive ya agi, ta ASU ajanga ashi.

ASU indang volunteers temi kanga saksalema shilem agiba asoshi pelaba lemsatepa liasü.



September 11, 2024 nunga iba mesük exercise agiba mapang aibelener nisung ti pua liasü. Ajisüaka tim ketdangsür temi iba sülen mera shidak magiba tebilemtsü lemsatep aser iba yongji maneni parnoki inyaker ta ashi.

ILP ozüng nung aibelener tem Deputy Commissioner nem agütsüba agütsüba mapang ASU tir Diezevisie Nakhro aser Vice President & Grievance Cell Convener Zhovito Rikha nati item nisungtem tangsa reprangshitsü nenshia ashi aser administration dang mapang shia inspections oa Kohima telungi aitba tesem ajunga nung mittsü ayongzüka liasü.

India Tatong Tir asoshi nomination meshir

Dimapur, Luroi/August 07 (TYO): Election Commission of India ajanga September 9 nü Vice President atema election agütsü asoshi sangdong ka Brehostibarnü agütsüogo, anungji nomination maparen tenzüker.

Nomination agütsüba August 21 nü tembangtsü aser August 22 nü documents scrutiny asütsü, ta sangdong ajanga ashi.

Nomination meyipa agütsü (withdraw) asütsü August 25 tatem asütsü.

Ajungbena Jagdeep Dhankhar mapa nungi anenba sülen India linük Tatong Tir menden tazüng akum. Pa kümsük 2027 küm August ita tembangtsü liasü. Mid-term poll asünungbo tasen shimsang küm pongu kümsük tema inyaktsü ta constitution nung shia lir.

Vice President shimtsü asoshi India senso asütsüla, arishi küm



35 junger alitsüla aser Rajya Sabha nung züngsem atema election agütsü temsüa alir asütsüla.

Nisungbai Government of India mesüra state sorkar mesüra subordinate local authority nung office of profit kecha bena malitsüla. Tatong Tir elections nung ruling NDA-i ayong-ayonga takok angutsü.

India Tatong Tir ya Lok

Union-isa nüburtem dang saksalema alitsü aser asen li wazüka ayutsü ya arok mapa ama bilemtsü ayongzüka liasü.

Talisa ali kiburtem dang pei indang ki o jen, talisa commercial mesüra talitsü ki agütsüdang kuli kaketterem kanga junga jangjatsü ajungshia liasü.

Lisopur wazüka alitsü asoshi Inner Line Permit ya tongtipang lir, anungji ozüng amshiba agency temia ILP ozüng shidak amshitsüla, ta ASU-i ashi.

Parnokisa Angami nunger aliba tesemtem nung district administration den teka amteper iba ama maparen maneni inyaktsü sentong lir ta ashi.

Iba inyakyim nung ASU indang-indanga nokdaka lir aser nüburtem dang mejangjaba nisung aliba metetera ketdangsür mesüra Union nem osang agütsütsü ayongzüker, ta ASU ajangasa ashi.

Sabha aser Rajya Sabha züngsem temi shimer aser Upper House nung nominated members temia vote agütsüteter.

Züngsem 543 aliba Lok Sabha nung menden ka tazüng lir aser züngsem 245 aliba Rajya Sabha nung menden pongu tazüng lir.

Rajya Sabha nung menden tazüng pezü aliba ya Jammu and Kashmir nungi pezü aser Punjab nungi ka lir. Punjab nungi menden ka ya AAP lenir Sanjeev Arora taoba ita state assembly bypoll nung shimba sülen azüngtsü.

House ana sentemer züngsem ajak agi 786 aser Tatong Tir akumtsü asoshi votes 394 nüngdaktsü,

Lok Sabha nung BJP-i aniba NDA telok nung züngsem 293 lir. Kasa ruling alliance ya Rajya Sabha nung züngsem 129 lir, anungji NDA nominee nem vote 240 agütsütsü teimla lir.

Mkg nung PHH & AAY ration cards meshir

Dimapur, Luroi/August 07 (TYO): Department of Food & Civil Supplies, Government of Nagaland ajanga taoba mapang sangdonga aliba ama aser National Food Security Act 2023 ajanga tashi agüja aliba kübok Nagaland Food & Security rules 2016 yanglua aliba ama Priority Household (PHH) aser Antyodaya Anna Yojana (AAY) ration cards nungi teyari agirtem, shirnok eligibility criteria küboki maiter i.e., sorkar tenzüker t contractual employees/fixed

payees, casual laborers, daily wagers, angawadi/ASHA employees, Home Guards, Community Health Volunteers aser Grade IV Staff dak alaka) aser küm nung sen 2.5 lakh dak tema family incomes alirtem dang pei indang Ration Cards iba office nem August 30, 2025 tashinung agüjang ta metetdaktsür. Iba sangdong sülen manitakba putetra Act indang ozüng agi melaba ama merenshitsü, ta N. Jamonger Ao, District Civil Supply Officer,

Mokokchung ajanga sangdong ka nung ashi.

Küm nung income sen 2.5 lakh aser tema arur temi General Household (GHH) ration cards amshitsü akok. Iba indang form ya Office of the District Civil Supply Officer, Food & Civil Supplies, Mokokchung aser PDC incharge officials of Tuli, Mangkolemba, Kubolong, Chuchuyimlang, Changtongya, Alongkima & Longchem ket nungi angutsü, ta sangdong ajanga ashi.

Mokokchung nung saura-e mitra training agiogo



Dimapur, Luroi/August 7 (TYO): Kilem nung Solar PV Installation routine maintenance aser saura-e mitra training sentong August 6 aser 7 nü NPCCHH & SELCO Foundation DHFW-i ayongzüka CMO Conference Hall, Mokokchung nung agiogo.

Iba sentong nung Dr. Nyanthung Kikon SNO, NPCCHH, DoHFW Kohima, Dr. Nounengulie Kire consultant, Ms. Tsukjemsangla Consultant NPCCHH, Kohima, Dr. S. Marina Yaden, CMO, Mokokchung aser Dr. Takusunep Dy. CMO, Mokokchung nungeri shilem agia liasü.

Iba sentong ya Dr. Martula, DVBO & DSO aser S. Jongtosang, District Pharmacy Officer, Mokokchung na lenisüba nung agi.

Sentong nung Project Coordinator SELCO Foundation, DoHFW Kohima

Imkongsungla Jamir-i, SELCO Foundation indang okila agütsü aser iba Foundation inyakyim aser training sentong indang metetdakja liasü.

Dr. Marina Yaden o jembiba mapang iba sentong ayongzüka katsüba atema SELCO Foundation aser NPCCHH dang kanga pelaba lemsatep. Laisa, district nung health unit tem solarization ya maongka ka ta shia sentong nung shilem agirtem dang pei health unit tem kanga junga anepalutsü ajungshia liasü.

Kasa mapang nung Dr. Nyanthung Kikon-i, taküm melenshidaktsütsü asoshi jenjang agiba atema SELCO Foundation dang kanga pelaba lemsatep aser sentong nung shilem agirtem dang training nung agütsüba shisatsü ajak angazüka tarutsü atema sübutsü asoshi maongka agitsü ajungshia liasü.

Training ya Imlisunep-i agütsü, shibai Solar PV mapangshia anepalua alitsü koda tongtibang iba indang tangazükba agütsü, Solar PV system aser iba indang components aser solar panels tem mapangshia anepalua alitsüba indang tangzükba agüja liasü.

Iba training ya trainees tem nem Solar PV System, mapangshia asadanga alitsüba inyakyim, anepaluba yimya aser incidental Management System dak sendakba nung tangazükba agütsütsü nükjidong nung ayongzükogo.

Mokokchung District nungi Health staff temi iba training sentong nung takok ngua denogo. Maneni iba training ya Mangkolemba nung August 8 nü agitsü, kong Mangkolemba, Alongkima aser Tsurangkong Block nungi Health staff tem nem tangazükba agütsütsü.

NECTAR-i orientation sentong ka ayongzüka agi

Dimapur, Luroi/August 7 (TYO): Nagaland Education Project-The Lighthouse (NECTAR)-i ayongzüka, Lighthouse School Complex Implementation Teams (LSCIT) aser LSC Manager tem atema 'School Transformation Strategy' dak sendakba nung anogo ana asoshi orientation sentong ka ayongzüka agiogo. Iba sentong ya Directorate of School Education, Kohima nung August 5 aser 6 nü agia liasü.

Iba sentong nükjidongji Nagaland kübok Lighthouse School Complexes (LSC) 16 nung school jenjang, achayangba aser kaketshirtem result tajungba kümdaktsütsü atema lenla ajak kongshia tasa ka benoktsü asoshi lir.

Orientation lapokba sentong nung o jembiba mapang School Education Joint Secretary aser NECTAR indang Deputy Project Director Avelu Ruho-i ashiba agi, model school tem ama LSC indang tebilemdangba ya 2019 küm taoba Principal

Secretary of School Education aser SCERT, Menukhoh John-i sorkar school tem asüngsashitsü nükjidong nung benoka liasü.

Ruho-i ashiba agi, School Transformation Strategy ya National Education Policy 2020 nungi agizük aser Nagaland kübok lokti balala den asüdangyaba sülen benoka liasü. Laisa, Meluri district nunga school tem nung temelenshi bener arutsütsü ta ashi. Lai Implementation Team tem dang, Nagaland nung aliba tanurtem tarutsü yanglushitsütsü atema inyakyim nung parnok ya tongtibang shilem agir kaka ama züngshitsü ajungshia liasü.

Kasa mapang nung Director of School Education, Razouseyi Vese-i, shisaliok ya tatidang ajangtetba kija masü ta shia, tanurtem mapa angutsüsa aser yimayimpong tajung beshiba nisung kaka kümdaktsütsü asoshi tangazükba agütsütsü kodang tongtibang iba indang lemsatepa liasü. Paisa, Department nung human resources peria lir aser state

terenlok atema parnoki mapa jeta inyaktsüji kanga tongtibang lir, ta ashi. Pai, grassroots level nung inyakeritem temelenshi tuluba bener arutsütetsü ta shia, Implementation Team tem dang parnoki pei school nung temelenshi adokdaktsütsü ajungshia liasü.

Maneni Principal Director of DoSE, Shashank Pratap Singh, IAS-i, par Department school ketdangsürtem, tesayurtem, kaketshirtem aser lokti yongtsü nung sensaksem dak kanga metaloker lir ta ashi.

School Transformation Design Team-i lensayua orientation nung, tinyakertem shilem aser khuret, Legalities, Digital Technology, School Vision & Mission, Annual Curriculum & Pedagogical Plan, aser Operations & Implementation amala onüktem nung tangazükba agüja liasü.

Training tembangba sülen Implementation Team temi pei LSC tem nung item inyakyimtem benoka inyakba achayangtsü.

Zubza ayong nung mejangjaba tasü mang ka ngutet

Dimapur, Luroi/August 7 (TYO): August 8 nü mejangjaba tebur tasü mang ka Zhekishe yimtsüng lushi kübok Zubza ayong nung apong daker lia ngutetogo.

Osang angashiba sülen police tem iba tesemi takaratiba nung ao aser tasü mang dak

sendakba nung ken o bushisü ngdanga liasü. Iba nisung ya tepset asütsü ta temulung melemer bilemer.

Temzüng ozüng kübok tinyaktsü maparen ajak tembanga inyakba sülen tasü mang ya post mortem examination/identification

atema District Hospital morgue-i benerogo.

Ken o dak sendakba nung asüsanger kinunger, adainu aser medemertem dang Officer-in-charge Niuland Police Station, Dimapur (Mobile No. 7085055025) den tongteprateptsü metetdaksüogo.

Angh-i Metümnyo benjung salem lemsatep

Dimapur, Luroi/August 7 (TYO): Nagaland Angh La Ganesan-i sangdong ka ajanga Yimkhiung nung aser Nagaland nung aliba nüburtem den Metümnyo benjung salem lemsatepogo.

Iba benjung ya tenüsang aser tetushi agütsüba benjung ka aser iba ajanga Yimkhiung nung takra sobaliba sayur. Benjung mapang asür nem tetushi agütsür aser yimjiyimjung aser tesunep

asoshi temaotsü meshir.

Metümnyo ya longjemba, akangjungshitepba aser kibong aser lokti tsü ngda tesendaktep akangshiba mapang ka lir.

"Iba benjung amungba ajanga ajak nem tepela, anema aliba aser temaotsü bener arujang ta aser telongjem tanüla agi asenok ajak yimjung tesunep aser terenlok dangi aniang ta sarasademja atar," ta Agnh-isa shisem.

NU nung National Handloom Day amung

Dimapur, Luroi/August 7 (TYO): Committee for Indigenous Traditional Knowledge of Nagaland (ITK-N), Nagaland University-i August 7 nü Crafting Culture: sütakba, Crochet, Jewellery Making aser Banana Fiber Art dak sendakba nung anogo ka atema Workshop ka ayongzüka agiogo.

Iba sentong nung VC (I/C), Nagaland University, Professor Bendang Ao tongti tejaoker aser General Manager, District Industries Centre, Mokokchung, BAsangla tetushi tejaoker liasü.

Sentong ya Assistant Professor, Centre for Biodiversity Studies, Dr. Viheno Iralu lenisüba nung agi.

Sentong nung o jembiba mapang Inspector, DIC, Mokokchung, Renbenthung Kikon-i, local handloom industry tem asoshi sobaliba terenlok aser rongsen azüktsü lenmang sadema lapoka aliba indang metetdaksü.

Sentong nung o tatsüka jembiba mapang Prof. Bendang Ao-i, iba sentong tajung ayongzüka atema tenüsang agütsüba den university lokti dang sobaliba inyakyimtem asüngsashi sentong nung yakyaka shilem agitsü ajungshia liasü.

Kasa mapang nung B. Asangla-ia, lanurtem dang sobaliba inyakyim nung shilem agitsü ajungshiba den artisan tem atema sorkar scheme balala aliba indang metetdaksü.

Iba sentong ya Department of Sociology nungi Prof. Athungo Ovung-i tepela o jembir tembanga liasü. Sentong tembangba sülen workshop tenzü, kong handloom weaving, crochet techniques, handmade jewelry aser banana fiber craft dak sendakba nung tangazükba balala agüja liasü.

Iba sentong ajanga sempet lemsateptsü, sobaliba melenteptsü aser sobaliba shisatsütem lemsateptsü asoshi sabang tajung ka agütsüogo.

Yingli College nung Vikas Bharat Yuva Connect sentong agiogo



Dimapur, Luroi/August 7 (TYO): Department of Youth Resources & Sports, Government of Nagaland den longjemer Yingli College, Longleng NSS Cell-i ayongzüka 'VIKSIT BHARAT YUVA CONNECT PROGRAMME 2025' agiogo. Iba sentong ya EMERGENCY PERIOD IN INDIA" omen nung ajemdaker August 6 nü agia liasü.

Sentong nung omen dak ajemdaker Debate aser Youth Parliament tetoktepba ayongzüka agi. Indian parliament aser iba ajanga kija aser lokti dak kongshiba indang tangazükba agütsütsü nükjidong nung iba sentong ayongzüka agiogo.

Sentong ya Assistant Professor Department of Sociology Kiriahungle Haihing lenisüba nung agia aser Vice Principal, Yingli College Dr. B. Henshet Phom-i lokti pela agizükba o jembir.

Sentong nung shisalen sayurji District Sports Officer,

Longleng Kenongoto Thokhwe liasü, aser pai India nung Youth Parliament ya koda tongtibang iba indang lemsatep.

Tetoktepba nung takok angurtem:

Debate tetoktepba:

Motion:

Chuthai L. Phom

Against:

P. Phangmei Phom.

District Youth Parliament tetoktepba:

1. Ms. Kehungngaule Haihing,

2. Ms. Hentong Phom and

3. Ms. Ladong Phom.

Ajak sentepet iba sentong nung shisalen sayur ka, NSS Volunteers 240 aser Faculty 19 densema nisung 260-i shilem agi. College nung kaketshirtem aser tesayurtem nem Indian parliament indang osang tasentibatem metetdakja liasü. Maneni sentong nung Assistant Professor Department of Sociology Dhapne Chungphang-i tepela o jembiba liasü.



August 07, 2025 nü New Delhi nung M.S. Swaminathan Centenary International Conference nung Ato kilonser Narendra Modi, Union Minister of Agriculture & Farmers Welfare Shivraj Singh Chouhan aser M.S. Swaminathan Research Foundation (MSSRF) chairperson, Soumya Swaminathan nung noksa nung angur.

Jammu & Kashmir sorkari kaket 25 nokdangogo

New Delhi, August 07 (Agencies): Jammu & Kashmir sorkari kaket 25 nokdangtsü atema tetuyuba agütsüogo; item kakettem rongnung kanga nüngtugu kaket zülurtemi züluba kaket aika densema lir.

August 5, 2025 nü Jammu & Kashmir sorkari, kaket 25 ji telok razüka odaktsütsü ajungshiba aser India nung nuchiso den akhümket atema amokmeren lir ta bushitetogo, ibayongji Bhartiya Nyaya Sanhita 2023 özüng kübok Arrla 98 nung ajemdaker item kakettem nokdang, ta metetdaksü.

Administration-i nokdangtsü tuyuba kakettem rongnung Booker Prize award angur, Arundhati Roy-i züluba kaket Azadi, yimtenren dak sendakba kaketzülur AG Noorani-i züluba kaket The Kashmir dispute 1947-2012, Sumantra Bose-i züluba kaket Kashmir at the Crossroads aser Anuradha Bhasin-i züluba kaket A Dismantled State (The Untold Story of Kashmir after Article 370) densema lir.

Jammu & Kashmir Home

Department-i sangdong ka ajanga, item kaket bushisüngdangba den külemi intelligence osangtem ajanga, item ama kakettem azüngba ajanga özüng alema inyaktsü aser kiralongratsü atema lanurtem ajungshir ta bushitetogo, ta metetdaksü.

Home Department-isa, "Item kakettemji puti otsü mesüra yimtenren dak sendakba kakettem lir ta jembir, ajisüaka lanurtem anisaba nung item kaket ajanga tongti shilem agir," ta metetdaksü.

Jammu & Kashmir Lieutenant Governor, Manoj Sinha-i tetuyuba nung ajemdaker Home Department nung Principal Secretary, Chandra Shekar-i tetuyuba nungji sign süogo.

Jammu & Kashmir nung Arrla 370 agienba sülen küm 6 ajungba mapang ka nung aser literary benjung amongba mapang ka nung Jammu & Kashmir sorkari item kaket nokdang.

Item kaket nokdangba dak sendakba nung Law Secretary Achal Sethi-i, "Item kaket ya

menüngtsü makok mesüra ayoktsü makok. Aibelenertem nem temerenshi agütsütsü. Publisher temi item kaket ano menünga tepuokdak ayutsü," ta metetdaksü.

Kaketzülur aser journalist Anuradha Bhasin-i, "Sorkari nokdangba kakettem rongnung nüngtugu kaket zülurtemi züluba kakettem densema lir. Ni züluba kaket nung Arrla 370 agienba anema zülua lir. Iba tetezü 'kari dangi sorkar anema jembira parnok anema inyaktsü'," ta ashi.

"In Search of a Future (The Story of Kasimir)" kaket zülusang, David Devadas-i, "Iba tenokdangba ya tesasatsüka lir, kechiyong kaket tem nokdangbaji democratic tangatetbatem anema lir," ta ashi.

Anuradha Bhasin-ia social media ajanga, "Ni item kaket teimbaka züngdangogo aser kabo ni züluba kaket lir. Kakettem nung keta alibatemi jungjunga bushisüngdang züluba lir aser item kaket kati danga kiralongra pu-masemer," ta metetdaksü.

PM Modi aser BJP Tir Naddanati linük tatong Tir candidate shimtsü

New Delhi, August 07 (Agencies): September ita nung linük tatong Tir election agütsü lia Bodhbarnü BJP-i aniba National Democratic Alliance (NDA) teloktep nungi lenirtem senden ka menogo; iba sendenji defence minister Rajnath Singh leniba nung amen.

Iba senden nungji linük tatong Tir candidate shimtsü atema NDA-i Ato kilonser Narendra Modi aser BJP Tir, JP

Nadda na nem tashi agütsüogo.

Senden tembangba sülen Union parliamentary affairs minister, Kiren Rijiju-i, "Ato kilonseri kechi telemtetba agidir ibaji teloktep nung aliba party ajaki agizüktsü," ta metetdaksü.

Tatong Tir election atema candidate temi tenüng agütsütsü asoshi tatembangbuba anogoji August 21 anogo asütsü aser September 9 nü election agia kasa anogo nungsa vote zünga

election agiba osang sangdongtsü.

July 21 nü tzüngluruwa mongpu Parliament senden tenzükba anogo nung linük tatong Tir aser Rajya Sabha chairman, Jagdeep Dhankhar-i ajungbena tatong Tir menden nungi anen.

Pai pa temang mejungi dang aliba kuli nung ajemdaker iba menden nungi anenba shidi Tir, Droupadi Murmu nem agüja liasü.



August 07, 2025 nü New Delhi nung Parliament kima TMC MP tem- Saayoni Ghosh aser June Maliah na den opposition MP temi Bihar nung Election Commission-i benokba Special Intensive Revision (SIR) anema longkak aitba noksa nung angur.

US-i saru atuba ajanga rongsenket tsüng mejungi kongshitsü: Kharge

New Delhi, Luroi/August 07 (Agencies): US Tir, Donald Trump-i India nung osettsüset nung saru shilem 50 agütsü sangdongba dak sendakba nung Congress party Tir, Mallikarjun Kharge-i Modi-i aniba sorkar sashia aitsüogo.

Kharge-i, iba ya India nung foreign policy tamakok tulutiba lir, ta ashi. August 1 nü Trump administration-i India nung osettsüset nung saru shilem 25 agütsü sangdonga liasü, iba sülen hopta ka shir lir ano shilem 25 tusemstsü sangdongogo.

Kharge-i, Modi sorkari India nung rongsenkettzüng jenjang kümzüka meyutet, ta aitsü. Paisa, "Asen linük foreign policy kanga mejungia aliba mapang ka nung Trump-i saru shilem 50 sangdonger," ta metetdaksü.

Congress Tiri X ajanga sorkar tamakok pongu metetdakja, "1. Donald Trump-i, pai tiyongtsü ia jembiba ajanga rara anen ta jembidang nai (Modi) ola madok. Pai ibaji 30 ben shi jembigo aser maneni jembir. 2. November 30, 2024 nü Donald Trump-i BRICS züngsem linüktem dang saru shilem 100 agütsü amokmerena liasü. Trump-i 'BRICS ya tasü' ta sangdongba mapang nung PM Modi-a menürema mena liasü. 3. Trump-i saru atutsü ita aika sentong renema liasü. Asenok ajaki ibaji meteta dang liasü. Ibaji ajanga takoksa ajemtsü atema nai Union Budget nung Agriculture, MSMEs aser industries densema tongtubang sectors atema kecha meinyak. 4. Ner minister temi joko ita aika America den

shishilembaba tsütsü tezüngzüktep agütsü atema jembia arur. Karbo anogo aika Washington nunga moga liasü. Nai US den shishilembaba tsütsü tezüngzüktep magitet. Tang Donald Trump-i asenok amokmerener, ajisüaka nai ola madoker," ta metetdaksü.

Kharge-i, "US-i saru atuba ajanga India nung rongsenkettzüng mejungi kongshitsü. India-i (2024 küm) US dangi export asübaji sen 7.51 lakh crore jenjang liasü. Saru shilem 50 agiba tetezü rongsenkettzüng tsütsü sen 3.75 lakh crore takoksa angütsü," ta metetdaksü.

Paisa, talisa MSMEs, aluyimba, mamatzü, engineering osettem, electronics, sentilong, mozü, petroleum products aser cotton süoshi sectors nung takoksa kanga angütsü, ta ashi.

"Iba tebilemstsü atema kechi inyaktsüar ner sorkari memetet. Iba foreign policy tamakok atema nenoki küm 70 Congress sorkar nem tai metongloksüteter," ta Kharge-i ashi.

Ano külen tanga osang ka nung, ministry of external affairs-i sangdong ka ajanga, US telemtetba ya kanga tia maka; India-i linük atema maneni inyaktsü, ta metetdaksü.

Bodhbarnü US Tir Donald Trump-i ano saru shilem 25 tusemstsü atema executive order ana nung sign süogo. Mezüngbuba saru shilem 25 ji August 7 nungi aser tanabuba saru shilem 25 tusembaji anogo 21 shi lir mapa küma benoktsü.



August 07, 2025 nü Thiruvananthapuram nung Kerala Chief Minister, Pinarayi Vijayan-i taoba mapang ISRO Chairman, S Somnath nem 'Kerala Sasthra Puraskaram' award agütsüdang tangokba noksa nung angur.

Kobi melii Russia Tir Vladimir Putin-i India semdangtsü: NSA Ajit Doval

New Delhi, August 07 (Agencies): Russia Tir Vladimir Putin-i kobi melii India semdangtsü, ta Brihostibarnü National Security Advisor (NSA), Ajit Doval-i metetdaksü.

India-i Russia nung dang nungi totzü alizükba anema US Tir Donald Trump-i India nung osettsüset nung saru shilem 50 agütsü sangdongba sülen India nung lenirtemi iba atema o entepba mapang nung Doval-i iba osang metetdaksü.

Doval-i, "Tir Putin-i India semdangtsü aliba osang angashia onoki kanga yongyar aser kanga pelar. Kodang semdangtsüar anogo lemteter asütsüa akok," ta metetdaksü.

Paisa, "Asenok (India-Russia) tesendaktep kanga

junga lir aser partnership ji ajaki akhümstsübur ta nenoki jembibaji shidak," ta metetdaksü.

Trump telemtetba aitsüba den külemi India pusema Russia-i, shishilembaba partners shimtsü atema India dak temeden lir, ta metetdakja liasü.

Kremlin otongdar, Dmitry Peskov-i, "Shishilembaba partners shimtsü atema linüktem dak temeden lir. Russia den shishilembaba tesendaktep raksatsü atema linüktem ajungshibaji tim masü," ta metetdakja liasü.

Ano tanga osang ka nung, taruba hopta Trump aser Putin na ajurua senden amentsüa akok. Trump-i Russia dang Ukraine nung rara anentsü takhangba agüja arudar.



TIR YIMYIM YIMOBILEM (EDITORIAL)

DIMAPUR FRIDAY, AUGUST (LUROI) 08, 2025

Reservation ya kin apia masütsüla

Nagaland nung alir Naga nungur ajak ya India temzüng ozüng kübok balaka shiteta anepalutsü asoshi shimtetba teloktem rongnung 'Scheduled Tribe' kintem rongnung dena lir, anungji India nungsa süaka tangar tashitemeteter aser takar kintem den kasasa jenjang nung masü saka teküpbok jenjang aliba nübortem ama züngshia government mapa nung shimdanga aser kaketshitsü bushiba maparen nunga Naga nungur ama 'Scheduled Tribe' nisungtem nembo tamasayongi shilem balaka shiteta yutsür. Iba jagi dang, asenok ama yashiang shisa tenük lapokertema government mapa nung IAS, IPS aser IFS ama jenjang tulu 'Civil Service' nungi shir mapa tapu balala nung takok ngua government mapai iteter. Iba amaji, tazünga nunga, talisa technical azüngertema medical aser engineering ama azüngtsü maongka angur. Iba amajika 'Reservation' sentong mali nungbo ST telok rongnungisa asüyonga asenok ama Naga nungertembo India nungur alemli nungi tashitemetet kin nungi jakzüka chirnurtem den metokteptetsü. Iba kasa tangatetba nung Nagaland nunga Naga nungersa asüyonga telok ana, ka tejakleni aoba Advance Tribes aser ka tesüleni atsüngzüba Backward Tribe ta lemsar, tesüleni atsüngzüka aliba kintema tejakleni aoer kintem menepa arudaktsütsü asoshi government mapa nung aniokdang aser technical azüngi aotsü purtem shimtet dang 'Reservation' nung parnok asoshi shilem balaka shiteta yutsür anepalua arudagi. Ajisüaka, iba 'Reservation' sentong ya küm süitema aodang reprangshili aser tensa dak apet ajemshili ta aru masü saka taoba küm lir dak tali kena danga junga mereprangshii 'Reservation' nung yutsüba shilem tajemer masü tali tali dang lemzüksüba agi, Naga nungertemsa süaka tejakleni aoba telok nung adener Advance Tribe purtemi marem, iba 'Reservation' inyakyim ya khien jungjunga reprangshitsüla ta takangba agütsüba ola asenoki angashir. Atangji, iba taginüba aser takangba ken o ji government-i süoki ia bilema agizüksü nüngdaker, kechiyong 'Reservation' ajanga kar yaridang kar makoksatsüla. Ano, talisa Nagaland nungbo backward telok nung aliba kintemang Advance telok nung aliba kintem dang nungi tejakleni taoba, tajungba, temetetba aser takarba lir. Iba yongji, government mapa bushiba nunga aser tazünga menden asoshi raktepdinga, advance purtem asoshi anüngzüka shilem nungia backward purtemang tajungba angur. Aji oda, advance telok nung alirtem makamaitba agi pei lima nunga azüngtsü mekoki anendang, Backward telok nung alirtembo bendang lima talang nung oagi kaketreju tajung nung azünger. Ibaji dang masü saka ano kanga süoki ia bilemdangtsüba kaji, backward telok nung alirtem rongnunga shitakba tangar menepa tejakleni moutetba purtem masü saka tular aser takar chirnurtem dang 'backward' tenüng nung government mapaa angur aser tazüngtsü asoshi maongkaa agiteter. Atangji, item asangsang nung atalokbatem ajak ya jungjunga reprangdanga medemdangtsüla aser Nagaland nung government mapa bushiba nung aser technical azüngba nung tangar memenepba purtem asoshi shilem balaka shiteta yutsütsüba anosa nüngdakra, tangbo Naga kin apia masü saka kibong apia ayutsüla. Iba jagi takar aser tular kibongtem telok ka nung aser tilar aser sensaker kibongtem telok ka nung ta bendangtetsü aser Reservation-ji kin apia masü saka koba kin nungi südir sang tilar aser sensaker kibong nungi adokba chirnurtem meyong asütsü. Aji oda, takar o sensaker na bendangba aser tular o tilar na bendangba terüzük aser tasadangba ka alitsü. Iba jagi shibasa "reservation" küboki aittsüla aser shirnokbo maittsüla aji bendang-bendanga ashitsü. Idangjiang, tang backward nung aliba sensaker aser tilar kibongtem nungi adokba chirnurtema shitakba 'Reservation' ajanga lemzüksüba maongka agitetsü. Iba amajika inyakyim memelenshira, tang backward telok nung dena aliba kin koba dangbo na advance kümogo ta ashitsü aser advance telok nung aliba kin-a koba dang nabo backward nung denang ta ashitsü? Atangji, government inyakyim nung iba ama kanga nüngdakba temelenshi bener arutsüba jiyimsürtemia bilema alitsü imlar.

OLEMSABANG

OSHI RAKSABA KULI

~ P.Renthy Jamir.

Ao oshi tesamar ta züluba jembiba angur angashir tetsü tebu mesayuba agi kari English Nagamese jembiba agi kodanga Ao oshi mesamatsü, saka asenoki raksar aser item oshi tajung tetezü teratetsü shitak literal meaning raksar tai jembiba zülubatemi ASLB Ao Milen aser Tir Yimyim osang zulur aser AIR Kohima Mokochung Ao osang azüngertem ya lir. Item teraksar rongnungji asenok ajak dena lir aser raksaba aika rongnung kar yangi tatishitsü agiteta zülur.

Tamasa ASLB tangbo tenüng melenogo Arok osep nung tai rateta züluba kar.

Achishiben :- Tekalen tajung ta lir. Ajitai Achishiben tetezü tang achi menüp maipo tsük tang achishiben manüpa yakta aror.

Anentsüngsang:- Menena asür anogo piyong tzüngla aruba ya tai Anentsüngsang tetezü kar lui aodang telok kar aodang tzünglu teti anener iba dang anentsüngsang ta ajar saka menena asur tsüngsang dangbo menentsüngsang ta ajar.

Anabennüksak:- Talang nung mejangjai ka anguba tanaben reprangshi nung ang jangja angu ya tai ya tatsü talang asadanga khien nüksak nungi or ano tanaben or reprangba khien nüksak feet 100 anaben nüksakbo feet 200.

Anchilasang:- Talila junga inyaktetba tai ya tera tali tapong ta asüba nung tetyatsü jembir saka Dictionary meaningbo ya An tepong tepen sangteta adokba.

Ankongbang :- Mezüng an akongba tai. Ano an makong joko an akongtsü mapang yakta an akongtsü.

Apayu:- Aria bilem khenyongitai nükshia aginü yabo ozü meyong ta sünüali nia yabo kanga aginür.

Arsür:- Ozü tapu ka tai Arüri lepseta bener aor arürsüa aoba arsürozü ta süra ajibo ozü temerem ka.

Azünglaok:- Tetsüngdai O tajung bener aiba tai azünglaokya tajungren nung mamshir kilem tapok nungi ki telungi azungtzü tsük ken O tesüshia khien ao tetsüngdai mopung tamajung aiba ken O tajung ka bener tetsüngdai aiba tangbo Azüngtzüpeter ta ajar.

Chikhumung:- Molok dang tilaba chisa-a abenba tai Chikhumung tetezü kumong nunga asar molok nunga asar ya tesülen kumong nung angutsü.

Chishila:- Tetsü asüdang ta lir Aji tai tetsür tantsür asutsüa akok kiya mao asütsüa akok tetsür ka asüdang teyi tenu ka chishila asütsü laji senmanger masü.

Chiscüoscü:- Tejen otsü tai metoktepi ali ya tai. Ibai kenscüoscü ta ajatsü ken O tejen Aori teti ken O tejen kenscüoscü ta ajar aji mesüra tzüscüoscü ta ajatsü.

Chungpen :- Rong tu mejenba ajok tai ya ajok masü. Shiruru tepen ku talang aika aliba kor tepen chungpen.

Jakyim:- Temesüktep tejak kasa, tai jakyim tetezü teti par kidang jendangi aor shiotepa aliba, par denbo ni jakyim masü ni par kidangi monür.

Jangpa:- Lentong tai jangpa süra sung asodang tapok nung enokba lentong süra alia tuba sung talang nung yin ajangba.

Kolangbong:- Lalok khenyongi tai, kolangbong ya Au agi tzüdang ama yanglur piya enoker asemer yi enoka ayur. Lalok süra molok nung tzü masentsüsa Rin küp teper yi aika enoka anga nür.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pastor Glenn Germany khasettsü merangsang küm 60 tepuokdak ayutsü



Bernard Polite-i pastor Glenn Germany dak injang khaloktsütsü lia tangokba noksa nung angur.

August 07, 2025: Yaküm Pennsylvania nung tekülem sentong tagidak mapang nung nisung kati pastor khasettsü merangba ken o nung nisung ka aija küm 60 tepuokdak ayutsü obendang agütsüogo. Pennsylvania kübok North Braddock nung aliba Jesus' Dwelling Place Church nung pastor, Glenn Germany-i sabang nungi sayutsüngi tesüdak mapang nung arrshi küm 27, Bernard Polite-i pa khasettsü meranga liasü.

Kasa anepdangji Bernard Polite-i par kinünger kata khaseta liasü. Pastor khasettsü merangba atema pa küm 5 nungi 20 tashi tepuokdak ayutsü obendang agütsüba den külemi par kinünger ka khasetba atema küm 15 nungi küm 40 tashi tepuokdak ayutsü obendang agütsü. Ken o anaprongla nung aija obendang agütsüba sasep nung pa küm 20 nungi küm 60 tashi tepuokdak ayutsü.

Yaküm May 5 nü (Amongnü) Tenla kidang Pastor Germany-i sayutsüngiba mapang nung nisung ka Tenla ki telungi aitba pai angu. Nisungbaji tejaklen amen, ajisüaka ajungbena pai pistol ka agiteter pastor khasettsü merang saka pistol nungjagi injang metugu. Iba mapang nungji pastor Germany-i atsüksü merang aser deacon, Clarence McCallister-i nisungbaji nokdanga pistol rakzüka liasü.

Khristan ministry kati Uganda nung tanurtem nem wheelchair 200 agütsü

August 07, 2025: Khristan melungtet telok CURE International-i Africa aser Philippines na nung tanurtem atema hospital 8 lapoka lir; tawa parnoki International disability ministry Joni & Friends den senteper Uganda nung aliba CURE Children's Hospital nung matamabensar tanurtem atema wheelchair 200 tenla agütsüogo. CURE Uganda executive Director, Tim Erickson-i, "June ita tatembanglen nungi onoki wheelchair agütsür. Iba hospital nung arrshi küm 3-4 tetsür chanu ka dak tezü dak sendakba timtem liasü. Lai kü teka nung amba mechioki liasü. La tetsü kanga pelaa liasü. Lar jalaji tain akümer, aser lai la aolen ajak la ponger senzütsüsa aküm. Lar jala nem wheelchair agütsüba agi tetsü kanga pelaa liasü," ta metetdaksü.

Khristan ministry Joni & Friends-i wheelchairs ji CURE International nem tenla agüja liasü. Joni & Friends ministry nung tongti, Jason Holden-i, wheelchairs ji tesem ajak nung amshitettsü, ta metetdaksü. Joni & Friends ministry-i parnok indang Wheels for the World program kübok mapang shia matamabensartem nem wheelchairs tenla agütsür. Uganda nung wheelchair project atema Joni & Friends-i planning team ka ajanga Cure International den senteper nüngdakbapurtem nem wheelchairs agütsü. "Kasa nükjidong aliba organizations den amalitepa inyakba atema onok pelar. Onoki tanga mapang nunga tangartem den longjemer inyakogo, ajisüaka tang CURE International den longjemer inyakba yabo khenyongi balaka liasü," ta Holden-i metetdaksü. Erickson-i, "Onoki parnok nem Khrista temeim metetdaksüner. Iba ya tongmelang agi 'Yisui na meimer, aser iba ya nai tai ajanga masü. Tsüngremi na meimer aser ner chirnurtem yaritsü atema Pai iba hospital ya sütsüogo' ta lemsatepba temaitsü lir," ta metetdaksü. CURE Uganda-isa tanurtem aser tetsütem nem Khrista agizükdaksütsü aser Yisu den tesendaktep tajungba kümdaksütsü atema ajungshir. CURE Uganda-i shiranger anepalur tetsütem aser nurse tem dang nikongdang shia tekülem sentongtem nung adentsü ajungshir. Pastor temi hospital nung shirangertem ajak ajurua parnok atema sarasademtsür. Ministry-isa Khrista agizükertemji pastor 30 den metetpelaja Arogotem nung züngsem küma adentsü atema ajungshir.

Africa nung Islamic teloki Khristantem teimbaser nisung 22,000 tepsetogo

August 07, 2025: Tesüiba küm ka tsüngda Africa tesem balala nung Islamic teloktemi nisung 22,000 dak tali tepsetogo aser asürtemji teimbaka Khristantem lir, ta Africa Center for Strategic Studies (ACSS)-i metetdaksü. Yaküm July ita nungi taküm June 30 tashi nung Africa tesem balala nung Islamic telok 10-i nisung 22,307 tepsetogo, ta ACSS-i metetdaksü. "Tesüiba küm ka tsüngda tepsetba nisungtemji tesadang shibo (10,685) Sahel region nungi lir. Iba region nung Mali, Chad, Nigeria, Burkina Faso aser Cameroon densema linük 10 lir. Islamic teloki tepsetba asürtem shilem 99 bo Lake Chad Basin densema item region asem nung lir," ta parnoki metetdaksü. "Africa tesem balala nung ali 950,000 square kilometre bo sorkar kübok mali, kechiyong kiralongrartemi item tesem nung timtem agütsür," ta parnokisa metetdaksü. Tesüiba küm 10 tsüngda Africa nung Islamic teloktemi nisung 150,000 dak tali tepsetogo. Tesüiba küm 10 tsüngda Lake Chad Basin nung aliba linüktem nung nisung 39,000 dak tali tepsetogo. Anogo ishika tejaklen ang Democratic Republic of the Congo kübok Komanda yimti nung Allied Democratic Forces-i Tenla ki ka amakdang Khristan 43 tepset aser kiojen aika rongdokja liasü. July ita tetenzüklena ADF teloki Ituri province nung nisung 66 tepseta liasü.

ANOGO ABEN TSÜNGREM DEN

Na kümzüksü asoshi temenen dokjang

Aser kodang parnoki parnok yim tezüleni anir aru, pai ashi : Nü taküm asoshi jenang, nai lep-a tereprang aser lerten li nunga tanen, na mesamatsü tenemi jenang (Lipok 19:17).

Tsüngrem chirtem kümzüksü asoshi Pa sendong tulu lir. Pai nisung meimchir nem tekümtet agütsür Pa den Kodak nung teti lidaktsütsübaji pa sendong lir. Yangi Tsüngremi pa chirtem anitettsü aser parnok kümzüksü asoshiparnok anitetta doktsür külen Pai parnok dang ashi : Nenok taküm kümzüksü asoshi jenang aser tesülen kenyongi meyipa tereprang ta ozüng agütsü. Yangi Tsüngrem O-i ashibaji odang tesülen meyip-a mereprangtsüba indang ashir masü saka tejen mapa aser temenen mapa nungi pilaa alitsü aser tanaben iba den tembar mayimtsü indang ashirba lir. Nisung kati temolung meyipa temenen toktsür aser ano tanaben iba sang nungsa pudaktsüra, ibaji agi tebü Tsüngrem sendong kodanga mataloktsü aser aji pai aginüba masü, anungji Pai yangi Pa chirtem dang nenshia ashibaji, nenoki kechi Temenen mapa toktsüogo aji joko tanaben tebenshi ta ashirba lir. Nisung meimchir ka Tsüngrem den litettsübaji teinyaktsü mapa aika dang lir. Kechiaser Tsüngrem o nung teinyaktsü aser tebenshitsü indang aika dang shia angur. Temenen nisung ka Pa den alitsü makok kechiaser aji Pa den kenyongi mapet. Ni kümzüknür ta shir külen, nisung kati temenen toktsütsü atsü-ayonga bilemra, aji kenyongi tamashi mapa asütsü. Pa den shidakba techir ka ama litettsübaji temenen toktsütetba takümi dang sütettsü. Lenden lenmang nung manentsü indang yangi Tsüngrem o-i ashibaji, oda taküm nung pei sünütsü süa malitsüba indang ashir. Tatishitsü agi alima lenden nung jajatsüji sadem-sademer aser yangji telinütsü ka dang lir. Yamaji kodang temenen nung lidir, takümji kanga jangaratemtsü ka ama dang asütsü aser yamaji takümji linütsü. Aji saka yamala takümji Pai molungba masü lir ta kanga junga angatettsüla. Anungji Tsüngrem O-i lenden aser tesadem tesem kecha nunga maneni dang, tenem leni dang atutsü indang yangi ashir. Tebu Tsüngremi molungba ama alitsübaji lenmang aika nung tasak ama asütsü, saka kodang Tsüngrem O-ji asen molung taroktiba nung kanga junga rezünga yudir, aji inyaka benshitsübaji mela-melar asütsü. Anungji taküm kümzüksü atemaji, lenmang lenden aser lisa tesadem repranga masü, saka tenem leni timtem agia atutsüla, yamaji asübaji dang Tsüngremi molungba lir ta yangi Pa O-i techirtem ajak ayongzüker.

'The Resurrection of the Christ' film tasenba 2027 küm sayatsü

August 07, 2025: Lionsgate film studio-i Mel Gibson-i direct asüba 'The Resurrection of the Christ' film tasenba shilem ana küma lemsar 2027 küm sayatsü, ta metetdaksü. August 5 nü Lionsgate film studio-i X ajanga, iba film mezüngbuba shilemji 2027 küm Good Friday anogo, March 26 nü sayatsü aser tanabuba shilemji ita ka lir May 6 nü sayatsü, ta metetdaksü. Taküm May 15-i Lionsgate-i, iba film production atema parnoki Mel Gibson den longjemer aser iba film ji alima tesem ajaklen sayatsü, ta metetdakja liasü. 2004 küm sayaba 'The Passion of the Christ' film kanga nüngtugu aküm. Iba film nung Jim Caviezel-i Yisu shilem agi aser Monica Bellucci-i Mary Magdalene shilem agia liasü, aser iba film tangokba nung dollar sen million 30 shi indok. Iba film sayaba mezüng hopta nung dollar sen million 83 aazük, North America nung dollar sen million 370 aazük aser alima nung dollar sen million 610 dak tali aazüka liasü. Osangbener den jembidang Lionsgate Motion Picture Group chair, Adam Fogelson-i, "Alima nung tesem balala nung nisung aika atema 'The Resurrection of the Christ' ya kanga yongyaa ataba film ka liasü," ta metetdaksü. The Passion of the Christ film tasenba indang jembidang Mel Gibson-i, "Iba otsü ya kanga junga ashitsü atema kodak tenyartemi Tsüngrem anema apusoba sülen kodak nungi jendokba nungi tenzüksüla," ta ashi. Iba film otsüji Gibson'er adianu Donal aser Randall Wallace nati küm trok agia züluogo.



GOVERNMENT OF NAGALAND
DIRECTORATE OF INFORMATION TECHNOLOGY & COMMUNICATION
Nagaland : Kohima 797001

No. DIT&C/TECH/AIRC-1/2025

Dated Kohima, 08th August 2025

NOTICE INVITING TENDER

The Directorate of IT & Communication invites e-tender for Supply of IT equipment and AI Agent & Pilot application development from IT empaneled firms in Nagaland.

The detailed tender documents can be viewed / downloaded from the following website, from **08th August 2025, 9AM (Server Time) to 22nd August 2025, 2 PM (Server Time):**

1. www.nagalandtenders.gov.in2. www.nagaland.gov.in

Amendments/Corrigendum, if any, will be made available on the above website.

Sd/-

Er. Sabou Yashu
Director, IT&C

Putin-i India semdangtsü, Trump dena ajuruteptsü

**Moscow, Luroi/August 07**

(Agencies): Russia Tir Vladimir Putin-i yakta India semdangtsü, ta National Security Adviser Ajit Doval-i Moscow semdangba mapang ashi. Anogobo ano melemtet, saka taküm sa semdangtsü amai Russian state news agency Sputnik ajanga ashir.

"Asenok mapang talangka nungi tesendaktep tajung lia arur aser onoki iba tesendaktep metsünga-reta züngshir. Asenok tematiba jenjang nung ajurutepta aser aser item ya ajanga tajangzük kanga lir. Tir Putin-i India semdangtsüba indang angazüka onok kanga pelar. Anogotem lemtetba tatemleni arur südi ta bilemer," ta NSA Ajit Doval-i ashi.

US Tir Donald Trump-i India nungner bener aruba oset nung tariffs shilem 25 tali meshia totuyuba tasen ka agütsür anogo

ka lir iba sangdong ya angashir. White House website nung ashiba agi, New Delhi-i maneni Russia nungner totzü aliba yong iba mera ya agir.

"Tang India-i indang-indanga mesüra danga lenmang nungi Russian Federation indang totzü alir. Russia-i Ukraine amakba dak sendakba national emergency provisions kübok tariffs tali meshitsü ya nüngdak aser tim lir," ta totuyuba nung ashi.

Tariff tasenba ya anogo 21 lir meshi tenzüksü, aser India nungner oset nung US duties meshiba ajak agi shilem 50 shi asütsü - koba Donald Trump administration-i Asia nungner trade partner dang tariff timtiba meshir alitsü.

Washington-isa Hokulbarnü tashinung Ukraine den raraba Moscow-i manenra Russia nungner totsü alirtem dang

secondary sanctions meshitsü ta shia lir. Iba rara ya küm pezü buba nung lir, koba Russia aser West tsüngta mangatetep adokba tulutibaji iba rara ya lir, aser ano India ama Moscow den maneni shishilempaba linüktem den mangatetep tali akumer.

Donald Trump-i pa indang social media sapang Truth Social nung India-i Russia nungner totzü nung jenjang ajemer alizüka tajangzük agir ta tai tonglokja, "India-i Russia nungner totzü jenti aliba kisüng masü, parnoki aika alizüka open market nung tajangzük tulu asoshi ayoker. Russian war machine ajanga Ukraine nung nisung kwi tepsetar parnoki mezüngshir."

Kasa mapang Vladimir Putin-i anogo ishika tsüngta Donald Trump ajurutsü imlar, ta Kremlin-i ashi. Russian Presidential Adviser Yuri Ushakov-i ashiba agi, tena ajuruteptsü asoshi anatsülen nungi osang agiteptar aser tena ajuruteptsü tesembo mulungtepogo aser osang tejanga yakta sangdongtsü.

India-i tariffs tasenba ya tim masü, kuli tejanga maka aser metemsü ta ashir aser Moscow den energy tesendaktep aliba bhukuma parnoki ozüng nung aliba ama aser linük tejangraba agi len ania alir ta ashir. Vladimir Putin-i semdangba ajanga India-Russia tesendaktep nung tali akangshitsü imlar.

2026 Ramadan matongdang Bangladesh election agitsü

Dhaka, Luroi/August 07

(Agencies): Bangladesh Chief Adviser, Professor Muhammad Yunus indang office-i Election Commission dangi shiti ka yokba nung February 2026 nung Ramadan metenzük dang linük indang parliamentary elections agitsü asoshi nüngdakba terenemtsü ajunga renemtsü mepishia liasü.

Iba shiti züluba ajanga sorkari Election Commission dang election agitsü asoshi osang agütsür alitsü.

Bodhbarnü Chief Election Commissioner dangi züluba shiti nung Principal Secretary to the Chief Adviser, M Siraj

Uddin Miah ajanga commission dang mapang telatet nung linük election talenba makai ochi aser tesunep nung agitsü asoshi nüngdakba maparen inyak tenzüksü ajungshia lir.

August 5 nü July Uprising Day nüngtem nung linük den jembidang Yunus-i taruba küm February ita Ramadan metenzük dang election agitsü mepishia Election Commission dangi shiti yoktsü ta shia liasü.

Iba anogo Chief Adviser-i jembiba athishia nüngdakba "institutional" aser "logistical" renem tenzüksü shiti nung ashi. Tesüiba küm 15 tashi nüburtem nem vote agütsütsü temeden magütsüi aruogo,

anungji tang agitsü aliba election ya democracy benjongmung asütsüla aser nisung ajak asoshi tepela aser mamashitsü anogo asütsüla, ta ashi.

Iba election ya kodanga mamashiba sentong ka asütsü, yimjung, ozüng shidak amshia, voters aika arua temulung agüja aser teputep nung vote agütsütsü Chief Adviser indang mangdang aliba shiti nunga shia liasü.

Election inyakyim nung nüngdakba technology amshitsü aser ochi, tesunep nung iba election benjong amungtsü asoshi sorkari Election Commission den yariteptsü, ta shiti nungsa ashi.

NAGALAND AFFIDAVIT 03AA 657741

I Shri. Sosangnuken, son of Arineba, resident of Signal Angami, Dimapur, Nagaland, do hereby solemnly affirm and state as follows :

1. That, I am presently residing in the afore-stated address and a government servant by profession, serving under D.I.C, Dimapur.
2. That, I am used by the spellings of my name as- **SOSANGNUKEN**, and the same has been entered in all my academic and service documents.
3. That, whereas, in my Service G.P.F. Statement covered by Serial ID : NI/IND Account No. 751, the spellings of my name was inadvertently entered and appearing as --- **SOSANGNUKAN**.
4. That, the names - **SOSANGNUKEN** and **SOSANGNUKAN** pertains to one and same person and that is me.
5. That, henceforth, I shall be known by the spelling of my name as - **SOSANGNUKEN**.
6. That, the above statements are true to the best of my knowledge and beliefs and nothing are false or concealed therein.

SEESUNUO SOPHIE
 NOTARY PUBLIC
 Regd. No. 176/2022
 Govt. of Nagaland

DEPONENT

Ghana nungner minister ana helicopter tsükokba nung asü

**Accra, Luroi/August 07**

(Agencies): Ashanti region tiyonglen mitkar indang helicopter ka tsükokba nung Ghana indang defence aser environment ministers den dangar nisung trok asü.

Defence Minister Edward Omane Boamah aser arishi küm 50 tain Environment, Science and Technology Minister Ibrahim Murtala Muhammed iba lendong nung asü, koba "national tragedy" lir ta Chief of Staff Julius Debrah-i ashi.

Z9 helicopter nungya ketdangsür asem aser passenger pongu mener linük yimtiba accra nungi Obuasi jila nung ozüng alema mijang atoba azüoktsü asoshi sentong ka nung adeni aotsü arem min nung tsükokba nisung ajak asü.

Helicopter tsükokdak nungi nisung tasü mang ti agizüka Ghana nungner wako agi alepa aliba süngden nung inoker Accra-i bener ogo.

Parnok agizüksü asoshi Air Force Base nung sentong ka agia liasü.

Nisung tasü mang kar mejangjatetba ajanga Muslim nungertem Brehostibarnü aremstü sentong aliba thinenogo. Sorkari asü pila sentong ano mesangdongi lir.

Ketdangsür temi iba tayimtsü tsükokba kuli mashi saka Ghana mitkari bushisüng dang tenzükogo ta ashir.

Ghana

indang

meteorological agency ajanga August ita tzüngsang kanga temokong asütsü sangdonga lir, aser tawa tzünglu aruba ajanga aremlen tesem aika nung tzüsü alu. Iba lendong atalokba tesem anasa aluyimer temi anepdang tzüsü alonga liasü aser iba mapang helicopter ao ta ashi.

Küm ishika tsüngta Ghana Air Force helicopters dena ajungben lendong balala asem ajuruba nung ibai tamajungtiba alitsü.

2020 küm Ghana Air Force Harbin Z-9 helicopter ka ajungbena Tamale Airport anasa anen aser taoba küm Ghana Air Force helicopter ka Ghana anüolen Bonsukrom region nung ajungbena anena liasü.

Ghana Tir John Dramani Mahama-i hopta tepiyong pa inyaksü sentong ajunga thinenogo aser Brehostibarnü nungi tenzükba anogo asem mangyimba alitsü sangdongogo.

Asürtem rongnung Ghana Deputy National Security Coordinator aser taoba Agriculture Minister Alhaji Muniru Mohammed dena lir aser National Democratic Congress party indang vice-chairman Samuel Saprang-a asü.

Iba tayimtsü ketdangsürtem ya Squadron Leader Peter Bafemi Anala, Flying Officer Manin Twum-Ampadu, aser Sergeant Ernest Addo Mensah ta sangdongogo.

Dr T Ao Trophy: Peren, Chumo, Zunheboto, Wokha & Dimapur nungeri takokangu



Kohima, Luroi/August 7 (TYO): Dr. T. Ao Trophy 2025 inter-district football tournament nung Brehostibarnü Tuensang, Tseminyu aser Niuland nungeri asaya kokogo. Iba asayamung ya tang Indira Gandhi Stadium, Kohima nung tasayadak lir.

Brehostibarnü mezügbuba asaya nung defending champions Tuensang team-i goal 6-0 agi Shamator kokogo.

Asaya nung Tuensang team-i mezügbuba goal ya Dongehanglen ajanga minute

11buba nung idaktsü aser iba sülen Bapen-i minute 12buba nung tanabuba goal idaktsü. Iba sülen Ayenmongba-i minute 30 aser 31buba nung goal ana idakja asaya mezügbuba shilem goal 4-0 nung tembang.

Asaya tanabuba shilem nung Namang-i minute 42buba nung goal pongububa aser Ayenmongba-i minute 60buba nung pa asoshi goal tasembuba aser team asoshi goal trokbuba idakja parnoki asaya akok.

Tanabuba asaya nung

Tseminyu-i asaya mekoki aliba nungi meyipa tur Meluri goal 3-1 agi kokogo.

Asaya nung mezügbuba goal ya Meluri nungi asayar Yithachu-i minute 27buba nung idaktsü. Ajisüaka Tseminyu team cpatain shiba district nungi tatembangbuba asaya nung shilem agia liasü pai minute 40buba nung goal ka idakja goal kasasa aküm aser iba sülen ano minute 53buba nung paista tanabuba goal idakja liasü. Asaya nung Tseminyu atema tasembuba goal ji Khiti Kath-i minute 58buba nung idakja liasü.

Asaya tembangba sülen Yhushalo Kemp ya district-level football career nung officially anenogo.

Maneni Brehostibarnü tasembuba asaya nung Niuland-i goal 2-1 agi Zunheboto kokogo. Niuland atema mezügbuba goal ya Apeto-i minute 29buba nung idaktsü aser Kakhevi-i tanabuba goal idakja liasü.

Zunheboto atema goal ka ya Tohika-i minute 61buba nung idaktsü.

August 8 nü asaya:

Match 21:

Noklak vs Longleng @9am

Match 22:

Mon vs Zunheboto @11am

Match 23:

Dimapur vs Chumoukedima @1pm

Match 24:

Peren vs Kohima @3pm.

1buba Nagaland Online Open Chess Tournament ayonger

Kohima, Luroi/August 7 (TYO): Phek district nung amenoker aliba Suthozumi Chess Association-i ayongzüka August 15 nü 1:30 ako nungi tenzüka mezügbuba Nagaland Online Open Chess Tournament asayatsü lir.

Iba asayamung ya Nagaland Chess Association tawabangba kübok ayongzüka asayatsü, koba state ajunga nung chess asaya ajungkettsü nükjidong nung ayongzüko.

Asayamung ya Lichess server nung 13 rounds Swiss League

format nung asayatsü aser Blitz time control minute 3 asütsü.

Category balala atema ajak senteper senpet sen 20,800 agütsütsü, kong Open category nung top 20 asayartem atema sempet aser Under-17 aser Under-11 category naprongla nung temaba jenjang nung tembangba asayar asem nem sempet agütsütsüba densema lir.

Maneni best female aser best veteran asayar nem sempet agütsütsü.

Iba asayamung nung Nagaland nung alirtem ajaki

shilem agitettsü.

Asayamung nung Open category atema züngoksema taah sen 200 aser Under-17, Under-11, tetsür aser veteran asayartem atema sen 100 asütsü.

Asayamung nung shilem agitsü atema tenüng züngoksemtsü asoshi tatembangbuba anogoji August 14 nü aonung 8 ako tashi asütsü.

Online ajanga züngoksemtsü aser osang tejangjaba agitsü atema iba number; 7005903450 nung tongteprateptsü metetdaksüogo.



Yimkhiung nungertem Metümnyo benjung amungba nüngdem nung Legends Club Pungro-i ayongzüka August 7 nü Public Ground, Pungro nung 4buba Metümnyo Volleyball Championship 2025 ayongzüka asayaogo. Iba sentong ya lokti lenir Youngthrunthong-i moaja liasü.

Canadian Open: Mboko aser Naomi Osaka na final asayatsü

Luroi/August 7, 2025 (Agencies): Naomi Osaka aser Victoria Mboko nati pei tata semifinal asaya akokba sülen tena WTA Canadian Open final asayatsü.

Mezügbuba semifinal nung Osaka-i 6-2, 7-6 (9/7) agi Denmark tsür Clara Tauson akok aser Canada tsür Mboko-i Elena Rybakina 1-6, 7-5, 7-6 (7/4) agi koka liasü.

Asaya nung tasembuba set asayaba mapang arishi küm 18 tain Canada tsür la ya alanga teka tachichilen atsükba ajanga timtemaka lai maneni kanga meranga asaya-a asaya kokogo.

Mboko, shibai round pezübuba nung top-seeded French Open champion Coco Gauff koka liasü, lai la teka yiruba nem minprong mesüdaktsüi asaya.

Tasembuba set nung asaya tetenzüklen serve break südaktsüba sülena lai maneni metoktsüi meranga asaya aser match point ka kümzüka den

game 10buba nung Rybakina indang serve break süa tena kasasa aküm.

Mapang mishitak nung double faults menaba ajanga Rybakina-i service game ka rakzüik aser 6-5 agi la tejakdang aküm, saka taruba game nung la indang serve Mboko-i break süa tiebreaker asayatsüsa aküm, koba Mboko-i koka liasü.

Season tenzüka mapang Mboko ya rankings nung jenjang 300buba nung liasü saka la tang 85buba nung lir. Final nung lai Osaka mekokaka la top 40-i aitsü jangaogo.

Osaka-i iba hopta Canada Open nung kanga junga asaya arudar, ajisüaka semi nung tanabuba set nung Tauson ya 6-4 agi tejakdang liasü, saka lai iba maongka magiteti Osaka nem menepdaktsü aser tiebreaker asayatsüsa aküm koba Osaka-i koka liasü.

2022 küm Miami nung final tonga asayaba sülen Osaka tang mezügbuba WTA 1000 level asayamung final ka asayatsü lir.

Son Heung-Min MLS club LAFC nung denogo

Luroi/August 7, 2025 (Agencies): South Korea nunger nüngtugu football asayar Son Heung-Min, Brehostibarnü MLS club LAFC nung denogo. Premier League club Tottenham nungi küm ter asayaba sülen pa LAFC nung denogo.

Son, shibai Tottenham nungi asaya 450 dak tema nung asayaba mapang goal 173 idaktsü, pa lenisüba nung asayaba mapang parnoki UEFA Europa League final nung Manchester United koka küm 17 sülen mezügbuba takok marok kokteta liasü.

Bodhbarnü LAFC pur Leagues Cup nung Tigres UNAL den asayaba mapang Son-a asaya repranger rongnung densema liasü.

"Ni idaki takok angutsü atema aru aser ni takok tashi junga asayatsü," ta arishi küm 33 tain asayar yagi ashi.

"Sonny ya alima ajunga nung kanga nüngtugu asayar ka aser alima nung football asaya nung takok tajungtiba anguba asayar rongnung ka lir," ta LAFC co-president aser general manager John Thorrrington-i ashi.

"Pai pa indang career nung taruba tapak asoshi Los Angeles shimba atema onok

kanga nema adanger," ta paista shisem.

Los Angeles nung adentsü atema Thorrrington-i shilem agiba indang Son-i lemsatet.

"Ochi jembiti süra iba ya kü atema mezügbuba club bo masü asü," ta pai ashi.

"Ajisüaka season tembangba sülen John den jembiba mapang pai kü mulung melendaktsü. Pai küm mulung aser tekelok melenshidaktsü. Pai ni kongi aotsüla aji sayu," ta Son-i shisem.

Son ya senior jenjang nung mezüng German club Hamburger SV nungi asaya aser iba sülen 2013 küm Leverkusen-i ao, kong pa season ishika asayaba sülen 2015 küm Spurs nung aden.

London nung amendaker aliba team nung adenba sülen Son Premier League asaya 333 nung asaya aser iba mapang pai goal 127 idaktsü aser assist 77 süja liasü. Pa UEFA Champions League nung 55 ben asayaogo aser iba mapang club atema goal 15 idakja liasü.

Son ya Asia nunger asayartem rongnungi asayar tanungtiba ka lir aser pa asayatsü atema sempet ajungba atema dang masü saka yimya ajunga ajanga ajaki kanga sakloker.

BILEMDANGANG

"Shirnoki taa-ji agütsütsü mulunga ali, takokbaji parnok meyong lir."